

春
秋
直
解

春秋直解卷七

郝敬習

文公名興，僖公子，在位十八年。

元年○春，王正月，公卽位○二月，癸亥朔，日有食之。

左

無朔

○天王使叔服來會葬○夏，四月，丁巳，葬我君僖

公○天王使毛伯來錫公命。

王使會葬，又錫之命，懷魯厚矣。繼立不稟命，喪畢不入見，孰謂周公之後知禮乎？君子曰：懷不寧侯，亦不足榮也。

晉侯伐衛

衛成公不朝晉。晉襄公使人告于諸侯伐之。先且居謂晉侯曰：勿效尤。乃朝王于溫。遂使且居胥臣伐衛。夫晉衛兄弟也。兄弟不相朝。何至布告諸侯朝王而後伐衛？是教諸侯事晉如事王也。故不稱先且居胥臣。而書晉侯伐衛。誌悖也。凡此皆春秋惡晉之大者。叔孫得臣如京師。

聘周也。非朝王不書。此書何也？王使再至以陪臣報禮不敬也。君前不氏稱叔孫陪臣不敢上屬天子也。衛人伐晉。

晉以不朝討衛。衛人不服。遂伐晉。君子曰：師直爲壯。

書伐晉壯衛也。春秋惡晉可知已。

秋公孫敖會晉侯于戚。

戚衛邑。晉侯取之。疆其田。魯使往問。書會尊內也。

冬十月丁未。楚世子商臣弑其君頹。

均公穀作髡

儒者論春秋以字爲褒貶。有如商臣弑父。何字以貶之。亦惟直其事。告諸天下後世而已。天下後世人有目胸有心。不待辭之畢。而瞿然栗駭。冰兢者。春秋之義通諸天下後世也。漢董仲舒云。爲人君父而不通春秋之義。蒙首惡之名。爲人臣子而不通春秋之義。陷篡逆之罪。所謂義非毀譽可私。所謂通。豈褒貶後

傳故曰春秋之直在民其不書父何也春秋之事非家事。顯爲父不君也。寵庶絀嫡名弗正也。傳其子以兇邪之潘崇教弗端也。議繼而婦人江羊與上聲何以得預幾事弗密也。仲尼曰君君臣臣父父子子不君不可爲父不臣不可爲子故禮有父之親有君之尊然後兼天下而有之養世子不可不慎此之謂也

公孫敖如齊

公新立通好也

二年○春王二月甲子晉侯及秦師戰于彭衙秦師敗績

秦報殺之役。晉人禦而敗。諸彭衛初。孟明視之敗也。繆公舍之。是役也。又敗。又舍之。雖後效可期。殺之骨朽矣。繆公貪而不悔。孟明喪而不戒。法不行。何以馭臣。臣無恥。何以事君。春秋奚取焉。而世儒競爲美譚也。

丁丑作僖公主

傳謂書不時非也。禮有喪主。有吉主。喪主既葬。反虞作矣。吉主小祥作矣。一尺之木。豈不辦。而後時乎。非也。是時議。躋僖閔上。作新主。納于大廟。祫非禮也。禮三年喪畢。新主乃入。僖公喪甫十五月。練主之外。更

作新主壇，故鬼廟以納新鬼，豈禮也哉？國之大事在祀，據事實錄而其夫可知也。

三月乙巳及晉處父盟

公及也。晉以魯不朝爲討，公往。晉侯使大夫陽處父盟。公慢也，往不如，反不至，不書。公諱也。君子曰：諸侯之相朝，如滕、薛、鄆，祀朝魯已非矣。齊桓圖霸，賄致諸侯，重耳承風，以力脅之。天子往而諸侯匍匐矣。自是朝晉以爲常，衛不朝而受師，魯不朝而受辱。終春秋諸侯朝晉百有餘年。鄭游吉語張趯曰：文襄之霸，諸侯三歲一聘，五歲一朝，則晉朝諸侯亦久矣。諸侯以

王禮事晉，置文武之肄于何地。世儒猶謂春秋肄晉，豈非醉夢之言乎。

夏六月，公孫敖會宋公陳侯鄭伯晉士穀。

穀作敖

盟于垂

隴

公敖作垂，敘鄭地。

晉謀衛也。敖會公在晉也。晉使大夫盟諸侯，故書晉士穀以誌晉之無禮。而宋鄭之君甘與齒，晉所以日驕也。凡晉之橫，始于重耳而甚于驪。

自十有二月不雨，至于秋七月。

八月丁卯，大事于大廟，躋僖公。

大事，禘祫也。合羣主祭于大祖廟，曰禘。禮諸侯五廟。

昭穆以世閔公先僖公三十五年而後僖公薨魯人以僖爲兄先非禮也衰經未除而用吉祭失哀敬之情矣繼世而弗爲之後亂昭穆之序矣亡新鬼于故鬼之前枉生死之期矣故君子謂之逆祀

冬晉人宋人陳人鄭人伐秦

報彭衙之役也取汪而還

公子遂如齊納幣

親喪未除而議婚非禮也

三年○春王正月叔孫得臣會晉人宋人陳人衛人鄭人伐沈沈潰

沈附楚也

夏五月王子虎卒

王官未有卒者。卒虎魯私交也。赴則書。

秦人伐晉

報三敗之恥也。師及晉郊。晉師不出。取王官。封穀尸。還儒者歸功孟明。夫以三敗博一勝。可謂功乎。

秋楚人圍江。○雨螽于宋。

障天而下曰雨。外災弔則書。

冬公如晉。○十有二月己巳。公及晉侯盟。

公再往始得盟。

晉陽處父帥師伐楚以救江

公穀無以字

君子曰救小而攻堅其弗濟矣

四年○春公至自晉

夏逆婦姜于齊

公自逆也婦有姑之稱逆女而稱婦夫人而稱婦姜
公逆而諱公何也公與姜氏已伉儷于未歸之先故
逆不使卿入國不至稱婦直也君子曰無禮鮮終敬
羸匹嫡二嗣不祿所由來也夫

狄侵齊

狄之害甚矣此豈亦有晉喪與

秋楚人滅江

君子固知晉之不能救江也

晉侯伐秦

報王官之役。君子曰。晉襄公之于秦。已甚矣。厥考受施。不爲不厚。文嬴歸晉。穆姬歸秦。兩君之好。不爲不盛。背父之德。違母之親。而以斂怨。豈人情哉。覆于穀。勝于彭衙。取汪。三施而報一。猶謂不平乎。其求之無已也。

衛侯使甯俞來聘

尋舊好也

冬十有一月壬寅夫人風氏薨

風氏莊公之妾僖公之母其子君矣其孫又君矣說者欲奪其夫人千乘之君而不得親尊祖豈人情乎書風氏別于嫡也稱夫人遂所尊也嗚呼盡矣

五年○春王正月王使榮叔歸舍且贈

珠玉曰舍車馬曰贈贈喪風氏也君子曰天子而舍贈諸侯之母可其舍贈諸侯之妾不可

三月辛亥葬我小君成風○王使召伯來會葬

穀作毛伯

重諸侯母也雖然莊公有二嫡乎子可以伸情君不可以過禮

夏公孫敖如晉

成風之葬王使再至大夫謝晉而公不報周非禮也
秦人入郡若

郡背楚卽秦復貳于楚秦人伐之

秋楚人滅六

六近楚小國臯陶之後

冬十月甲申許男業卒

六年○春葬許僖公○夏季孫行父如陳

脩好也

秋季孫行父如晉

聘也

八月乙亥晉侯驩卒

驩公作謹

晉襄公卒靈公爲世子在襁抱文公庶子雍長而仕于秦趙盾使先蔑士會迎之且至襄夫人抱世子哭于趙氏趙盾違初議而立靈公焉

冬十月公子遂如晉葬晉襄公

是年秦繆公卒不書秦不赴也或曰惡其殺三良也晉殺其大夫陽處父晉狐射

亦姑出奔狄

射殺作夜

狐射姑狐偃子賈季也初襄公謀以射姑將中軍趙盾佐之問于陽處父處父請以射姑佐盾射姑銜之

公薨射姑殺處父奔狄然則何以書晉殺曰主少國無政苟能正射姑之罪則射姑殺之也不能正射姑之罪則晉殺之也

閏月不告

谷

月猶朝于廟

禮天子頒朔諸侯奉之藏于祖廟遇月朔朝廟以其月之令告而集羣臣布之備遺忘防廢格也閏月不告廢禮也猶朝幸之繼此併廢朝矣

七年○春公伐邾三月甲戌取須句

劬公

遂城郛

吾

初魯復須句邾人再取之至是邾世子叛歸魯魯取須句居叛人非禮也城郛備邾也

夏四月宋公王臣卒

王穀作壬

不書葬有公族之亂也

宋人殺其大夫

宋昭公惡公族偪謀去之穆襄之族率國人攻公殺公孫固公孫鄭非其罪也

戊子晉人及秦人戰于今

平聲

狐晉先蔑奔秦

秦康公以徒送公子雍還晉而晉人已立靈公矣趙盾潛師薄秦人于令狐敗之先蔑遂奔秦士會從之狄侵我西鄙

魯以狄難告晉晉趙盾因狐射姑而讓狄焉仲尼所

以猶取于齊桓與管仲也

秋八月公會諸侯晉大夫盟于扈

鄭地

晉靈公新立趙盾爲政合諸侯固盟也大夫而合諸侯自垂隴始仲尼曰天下有道政不在大夫書會晉大夫直也說者謂公後至諱不敘國夫後至何足諱不敘國何足諱後至迂也

冬徐伐莒○公孫敖如莒泣盟

莒有徐難求平于魯書敖泣盟不書莒請盟何也敖非爲盟往也爲逆已氏其逆已氏也又託爲襄仲襄仲攻之惠伯平之書其志也

八年○春王正月○夏四月○秋八月戊申天王崩

襄王也

冬十月壬午公子遂會晉趙盾豚上聲盟于衡雍鄭地

扈之盟公後至晉以爲討襄仲往謝遂受盟

乙酉公子遂會雒戎盟于暴公作伊雒戎

雒戎將侵魯襄仲受盟左傳謂書公子珍之夫受盟

于戎何珍之有

公孫敖如京師不至而復丙戌奔莒公無而字

穆伯奉幣如周葬襄王不至而從已氏于莒禮天子

喪則諸侯奔魯使陪臣又不達非禮也

螽○宋人殺其大夫司馬○宋司城來奔

宋昭公不能于其公族又不善事其祖母襄夫人襄夫人因戴氏之族殺昭公之黨書司馬何也司馬者昭公弟公子卬也昭公欲殲公族而用子卬爲司馬禍由司馬也司城蕩意諸避亂奔魯不名不成其避也未幾求復遂及于禍

九年○春毛伯來求金

毛伯王卿士求金求賻也不稱王命諒闇也天子不私求財求金非禮也王室有大事魯使失致書求甚魯也且諱之

夫人姜氏如齊

出姜不安于魯公嬖敬嬴也

二月叔孫得臣如京師○辛丑葬襄王

毛伯來魯使乃往

晉人殺其大夫先都

初晉襄公欲登箕鄭父先都于上軍以士穀梁益耳將中軍先克曰狐趙之勲不可忘也乃以趙盾將中軍先克爲佐士穀梁益耳銜之崩得于先克有爭田之忿遂共殺克晉人殺梁益耳及都禍不始都也

三月夫人姜氏至自齊

晉人殺其大夫士穀及箕鄭父

按傳作亂者五人。釁由士穀梁益耳，不得中軍而怨先克阻之也。故箕鄭父先都可原，而五臣駢戮濫矣。書及累也。梁益耳，削得不書，非大夫也。非大夫不書何也？春秋之政在大夫，刑上大夫，則士以下可知。該賤也。

楚人伐鄭，公子遂會晉人、宋人、衛人、許人救鄭。

楚子師于狼淵以伐鄭，囚鄭三大夫。鄭受平，晉率諸侯之師救之不及。

夏狄侵齊。○秋八月，曹伯襄卒。○九月癸酉，地震。

冬楚子使椒來聘

椒教作教

越椒也不氏比內臣也春秋未嘗外楚可知胡氏小變其說公穀謂楚無大夫終春秋書楚大夫屢矣世儒強爲例耳

秦人來歸僖公成風之襚

襚

禮贈死及尸僖公喪九年成風喪五年而後襚非禮也先僖公從子也稱成風殊嫡也說者謂仲尼罪僖公之夫人其母豈聖人崇孝之意與

葬曹共公

十年○春王三月辛卯滅孫辰卒

傳謂大夫卒君與小斂則書日不與則否春秋無是也舊史詳畧耳

夏秦伐晉

報令狐之役說者謂仲尼狄秦若是則書狄伐晉可也豐水不改岐山如舊周人居之則夏而秦人居之則狄何稽乎

楚殺其大夫宜申

宜申謀弑楚子楚子覺而殺之賊臣亦稱大夫無削爵例也

自正月不雨至于秋七月○及蘇子盟于女栗

魯及也。蘇子，周大夫。頃王新立，求諸侯也。

冬，狄侵宋。

中原無歲無狄難，謂晉攘夷謬矣。

楚子蔡侯次于厥貉。

厥公作屈

蔡侯將導楚子伐宋。宋公逆楚子，與鄭伯相。楚子以田孟諸、蔡方媚楚。宋鄭因蔡求平，故獨書蔡侯惡黨也。

十有一年。○春，楚子伐麇。

君小國公作圖

說者以書君爲自將，書人爲微，非也。君不在，不稱君。君在，稱君可，稱人亦可。

夏叔仲彭生會晉卻缺于承匡

公穀無仲字匡
公穀作筐鄒地

晉謀諸侯之從楚者是後晉楚無歲不爭中原益紛然矣

秋曹伯來朝

卽位來見也

公子遂如宋

歸蕩意諸且賀楚師之不害

狄侵齊

諸侯患狄無寧歲矣

冬十月甲午叔孫得臣敗狄于鹹

十有二年○春王正月邾伯來奔邾公作盛

失地奔魯也

杞伯來朝

請絕叔姬

二月庚子子叔姬卒

公之女弟也。不書歸不允于杞也不書大歸未歸卒也。稱子從夫也不繫杞絕也。

夏楚人圍巢

近楚小國

秋滕子來朝○秦伯使術來聘術公作遜

告伐晉也。術不氏尊內也。君在臣不族說者曰：大夫書名，秦無大夫亦名，賢繆公非也。仲尼未嘗曰：我大夫而名，非大夫而不名也。爵有公侯伯子男，則有卿大夫士。春秋不黜秦伯，而世儒欲黜秦大夫，是秦有君，不得有臣。河居或曰：繆公賢名其使，吾聞賢不名，未聞名而賢之也。

冬十有二月戊午，晉人戰于河曲。

秦伐晉，趙盾帥師禦于河曲。史駢謀老秦師，秦師遁。史駢欲薄之，胥甲趙穿不用命，秦師遂入瑕。

季孫行父帥師城諸及鄆。

運後同

魯與莒爭也

十有三年○春王正月○夏五月壬午陳侯朔卒

邾子遯陳卒

數作遯條

邾文公元妃齊姜生定公晉姬生捷菑邾人立定公捷菑奔晉

自正月不雨至于秋七月

大旱也

大秦室屋壞

公作世室

大廟寢室也屋壞志慢也屋壞則烝嘗可知烝嘗壞則會孫可知春秋之義簡而至

冬公如晉衛侯會公于沓

踏公會下無公字

公朝晉也衛因公求平于晉

狄侵衛

狄之禍衛終于無已也

十有二月己丑公及晉侯盟○公還自晉鄭伯會公于

渠

鄭地公作渠還上公穀無公字

鄭亦因公求平于晉

十有四年○春王正月公至自晉

凡如晉往至必書甚晉也是歲春頃王崩周公閱與王孫蘇爭政不赴故不書崩魯不會故不書葬友邦

君薨赴然後會王崩不赴亦宜會崩不知葬不會史
不書無王也春秋因之而魯與諸侯之罪可考而知
矣

邾人伐我南鄙叔彭生帥師伐邾

邾人以魯不會葬來伐魯亦伐之

夏五月乙亥齊侯潘卒○六月公會宋公陳侯衛侯鄭
伯許男曹伯晉趙盾癸酉同盟于新城

宋地

趙盾主盟晉大夫長于諸侯矣

秋七月有星孛

佩

入于北斗

書異也

公至自會○晉人納捷菑于邾弗克納

趙盾以車八百乘造邾城下納捷菑邾人正辭晉師
退說者謂春秋善盾非也捷菑不當立審矣豈以大
國之出而皆奪人嫡事不慮可而動退晚矣

九月甲申公孫敖卒于齊

初穆伯從已氏于莒魯人立其子文伯文伯卒立其
弟惠叔惠叔請復其父未至死于齊遺二子于莒

齊公子商人弑其君舍

齊昭公元妃魯叔姬生子舍弗愛公子商人桓公庶
子也驟施于國得衆昭公卒舍卽位三月而商人弑

之或疑舍未踰年不宜稱君夫一日君矣況三月乎
或疑弑君猶稱公子夫商人非公子而誰豈公子遂
得弑君而弑君即非公子乎世儒所以輟轡于例也
宋子哀來奔

宋昭公無道高哀來奔往年蕩意諸亦來奔不稱名
書司城國難之辭也詩云正大夫離居不誠意諸也
未幾求復遂及于禍子哀來奔不復禍亦不及故書
名以信之聖言如化工隨物惡在名之賤而爵之貴
也儒者辭窮則稱變體吾未如之何矣

冬單伯如齊齊人執單伯

齊商人弑其君舍魯因王請叔姬王使單伯往商人執王使亦執叔姬

齊人執子叔姬

公穀謂叔姬與單伯私蓋商人構之果爾則經宜書及別書乃所以昭微故春秋之義微而顯

十有五年○春季孫行父如晉

爲單伯叔姬王命不行而微惠強霸世道之羞也

三月宋司馬華去聲孫來盟

子哀來奔華孫來盟宋岌岌亂作矣華孫者華督之孫督弑其君而孫猶爲司馬用人如此欲無亂得乎

魯君與盟又與宴是誨之貳也

夏曹伯來朝○齊人歸公孫敖之喪

公孫敖死于齊魯不許歸葬昔年而惠叔猶毀以請
乃許

六月辛丑朔日有食之鼓用牲于社

單伯至自齊

齊以晉故乃釋單伯賊臣執天子之老周不能討魯
不敢問微晉之惠脫于罟囚說者猶謂書官書名所
以貴之謬矣

晉郤缺帥師伐蔡戊申以蔡

蔡從楚新城之盟不會。晉卻缺帥師伐之。取盟而還。秋齊人侵我西鄙。○季孫行父如晉。

告齊難且請伐齊。

冬十有一月諸侯盟于扈。

謀伐齊也。晉與宋衛蔡陳鄭許曹人盟。魯不會。以齊難也。商人懼賂晉。遂不果伐。故不列諸侯。嗟夫商人辱天子。弑君囚君母。而竟以賂免。晉之謂逋逃主萃淵藪。非乎。故春秋所惡莫如晉。

十有二月齊人來歸子叔姬。

以扈之盟也。不言叔姬來言齊歸。歸由齊也。與哀姜。

同辭

齊侯侵我西鄙遂伐曹入其郭乎

諸侯之師寢商人益驕脩魯怨遂伐曹討朝魯也

十有六年○春季孫行父會齊侯于陽穀齊侯弗及盟
魯求平于齊季孫往受盟齊侯弗許

夏五月公四不視朔

自二月至五月不視朔公疾也疾不視朔常也四則
書

六月戊辰公子遂及齊侯盟于鄆西丘
齊地公作犀丘

疏作
蓄丘

公不往使襄仲納賂乃盟

秋八月辛未夫人姜氏薨毀泉臺

文公母聲姜也泉宮有蛇出似先公之數而夫人薨
謂臺爲崇毀之

楚人秦人巴人滅庸

楚饑庸人叛楚以秦巴之師滅之

冬十有一月宋人弑其君杵臼杵公作處

宋昭公無道子鮑公庶弟驟施于國國人附之襄夫
人王姬昭公嫡祖母也私于鮑昭公田夫人使帥甸
卒攻殺之立鮑爲文公司城蕩意諸死焉不及意諸

賤其不智也。已去求復不逮高哀遠矣。

十有七年。○春。晉人衛人陳人鄭人伐宋。

晉以諸侯之師討宋。弑昭公者。事雖不克。猶書四國。稱伐與其進也。

夏四月癸亥。葬我小君聲姜。聲公作聖○齊侯伐我西鄙。

六月癸未。公及齊侯盟于穀。

齊師至。公乃親往。

諸侯會于扈。

定宋鮑也。往年諸侯討齊。盟于扈。納賂退。今年諸侯討宋。會于扈。立賊還事。同書同。稱諸侯畧之。傷無王。

也

秋公至自穀○冬公子遂如齊

拜穀之盟也

十有八年○春王二月丁丑公薨于臺下

非薨所也

秦伯瑩卒○夏五月戊戌齊人弑其君商人

商人納閭職之妻而御其夫尸邠歆之父而僕其子

二人謀弑之

六月癸酉葬我君文公○秋公子遂叔孫得臣如齊

仲遂賀新君得臣拜會葬也仲遂因與齊人謀廢太

子。太子齊出也。

冬十月子卒。

文公夫人出姜生太子惡。及視敬嬴生接。阿文公欲立接以屬襄仲。惠伯不可。襄仲請于齊。齊侯許之。遂殺惠伯。弑二子。立接為宣公。不書弑諱也。稱子在喪也。

夫人姜氏歸于齊。

宣公奪嫡。出嫡母襄仲弑君。逐君夫人。齊人黨惡。殺甥以絕姑。天下之大惡也。書夫人歸齊傷之。

季孫行父如齊。

奪嫡之謀行父與焉仲尼譏三思以此

莒弑其君庶其

傳稱莒公無道黜其太子僕愛季佗僕因國人弑公
遂出奔春秋不書僕書莒禍由國人也弑父大惡聖
人詳審之至文致附會非春秋義也

春秋直解卷七終

春秋直解卷八

郝敬習

宣公名接。文公子。在位十八年。

元年○春。王正月。公卽位。

公子遂如齊逆女。三月。遂以夫人婦姜至自齊。

大喪未暮。皆急于親齊也。本仲遂之謀。故逆至書。遂婦有姑之辭。

夏。季孫行父如齊。

納賂。且乞會也。

晉放其大夫胥甲。父于衛。

討不用命也。初，晉與秦戰于河曲，晉甲。趙穿，違命縱敵。今七年矣，討不已，後乎不及。趙穿，趙盾之私也。君子知惡成之漸矣。

公會齊侯于平州

行父賂入平州，乃會定公位也。

公子遂如齊

拜平州之成也。

六月，取濟西田。

爲謀奪適者，齊也。出君母，致新婦者，齊也。成會定位者，又齊也。取濟西田，猶曰：殺我木桃耳。

秋邾子來朝

邾子新立也

楚子鄭人侵陳遂侵宋

鄭人以晉受齊宋之賂從于楚遂侵陳宋討其從晉也

晉趙盾帥師救陳○宋公陳侯衛侯曹伯會晉師于棐

林伐鄭

棐公作棐

不書救宋楚師先陳也胡氏謂宋弒君削之鑿也于棐林不成伐也遇楚師還

冬晉趙穿帥師侵崇

崇公作柳

崇秦屬也。晉欲與秦成而難請。趙穿謀侵崇。要之無功。書帥師專也。弑君之賊專而後動于惡。

晉人宋人伐鄭

裴林之役。楚人囚晉解揚。鄭故也。晉以宋伐之。

二年○春。王二月壬子。宋華元帥師。及鄭公子歸生。

帥師戰于大棘。宋師敗績。獲宋華元。

鄭公子歸生受命于楚伐宋。宋華元被執而逃。據事直書。詳明如此。何世儒之鑿說也。

秦師伐晉

報崇之役也

夏晉人宋人衛人陳人侵鄭

趙盾以三國之師禦秦師遂侵鄭楚救免

秋九月乙丑晉趙盾弑其君夷臯

臯公作捍

晉靈公無道趙盾驟諫日以殺盾爲事盾出亡使姪趙穿弑靈公于桃園盾遂返世儒謂盾不弑君春秋責備賢者耳仲尼曰吾之於人誰毀弑君大惡盾曷然無染而漫加之夫非毀與盾爲政穿爲從子河曲違命不問伐崇無功不討何爲者與桃園之事路人知之豈盾不知乎始謀先去自掩事成則返釋賊不討又使迎立新君以逋舊罪盾爲穿計非自爲計乎

史稱晉司寇屠岸賈作亂討靈之賊滅趙盾之族當時已明知盾弑君矣豈無罪責備道其實而已

冬十月乙亥天王崩

三年○春王正月郊牛之口傷改卜牛牛死乃不郊猶三望

郊非常祭而魯為常常則不書牛傷改卜死非常書非常以表常也終春秋書魯郊九龜違四牛災四非其時一議禮者可以觀矣是時天子新喪用吉祭禮與

葬匡王

楚子伐陸渾之戎

公穀皆無之
字渾穀作音

伊雒之有戎晉遷之也豢犬羊於堂室爲私屬以逼天子晉之惡可勝道哉子帶之亂襄王蒙塵皆陸渾爲之齊桓主盟不能討重耳納王誅子帶而戎無恙文宣以來夷狄之禍不絕書晉驩彊梁虎視諸侯以此屬爲爪牙其敢誰何昭公九年周詹伯讓晉之辭可知也楚宅南邦于戎非切膚非有精忠勤王奉辭伐罪之誠視友邦相攻猶彼善於此書曰楚子伐陸渾之戎名正言順世誇召陵城濮未昌言若此而乃執夷楚之例謂夷狄相攻果仲尼之意乎昔周之盛

也。獫狁居焦鑊，侵朔方。詩人憂曰：獫狁孔熾，我是用
棘。今戎逼處畿甸，天子不能討，楚人一舉又罪之。其
若王室何？或曰：楚子不當問鼎，夫恒情貴耳。過周郊
問九鼎，其誰不然？左氏因事脩辭，以蔽罪，是腹誹之
律也。或曰：春秋獎楚乎？曰：非獎楚也。書伐陸渾，以惡
夫遷陸渾者爾。

夏楚人侵鄭

鄭卽晉也

秋赤狄侵齊 ○宋師圍曹

宋文公盡逐武穆之族。武穆之族以曹伐宋，宋報之。

圍曹。宋書。曹不書。何也。舉其甚者。宋鮑殺母弟。殘宗室。國內糜沸。豈曹之爲患耳。身爲大逆。九族解體。外搆怨於諸侯。樂其所以亡者。

冬十月丙戌。鄭伯蘭卒。○葬鄭穆公。

四年。○春。王正月。公及齊侯。平莒。及鄭。莒人不肯。公伐莒。取向。

大之恤小也。平其忿而服其心。疇敢不從。以禮字人。若之何。伐而取也。

秦伯稻卒。○夏六月乙酉。鄭公子歸生弑其君夷。

傳稱弑靈公者。公子宋也。歸生與聞之。非也。魯宣公。

十年鄭人討靈公之賊，斲歸生之棺，國人有輿論矣。
書歸生寶錄也。豈其責備如世儒之云乎。

赤狄侵齊

夷狄之禍不絕，書其誰能攘夷者。

秋公如齊○公至自齊

朝齊也。以齊得國，故事齊惟謹。

冬楚子伐鄭

鄭從晉也。

五年○春公如齊

朝也。齊高固欲娶叔姬，止公盟而後遣。

夏公至自齊○秋九月齊高固來逆叔姬公般叔上

叔姬歸高固非公志也語云受人施者常畏人魯宣

公之謂矣

叔孫得臣卒

不日史闕也

冬齊高固及子叔姬來

諸侯女爲大夫妻常也夫以其婦來婦家亦常也此書何也止人君父而摟其處子其駢然而來也易所謂寇婚媾與

楚人伐鄭

鄭從晉也

六年○春晉趙盾衛孫免侵陳

陳卽楚也趙盾身爲賊主內弑君而外爭諸侯書侵惡之

夏四月○秋八月螽○冬十月

七年○春衛侯使孫良夫來盟

宣公不朝晉晉使衛人囿之良夫來盟詐也

夏公會齊侯伐萊

助齊伐也

秋公至自伐萊○大旱○冬公會晉侯宋公衛侯鄭伯

曹伯于黑壤

公以孫良夫之盟朝晉。晉人止公。責賂而後與盟。

八年○春。公至自會。○夏。六月。公子遂如齊。至黃。乃復疾也。禮大夫奉使出。聞親喪。徐行不返。身死。以尸將命。中道復非禮也。

辛巳。有事于大廟。仲遂卒于垂。壬午。猶繹。萬入。去籥。禮大夫卒。當祭不告。終事告。明日不繹。聞計而繹。舞入。去籥。皆非也。爲國以禮。防禮以微。雖羽籥楹枹。事小必詳。故曰。胡簋之事。則嘗聞之。才如管子。不辨反。拈樹塞。不爲大器。察邇謹微。春秋之義也。

戊子夫人嬴氏薨

公穀作熊氏

文公之妾宣公母敬嬴也。私襄仲而奪嫡。其薨也猶
之。夫人何例之貶焉。

晉師白狄伐秦

以夷狄攻親戚。春秋所甚惡也。

楚人滅舒蓼

蓼公作鄆

○秋七月甲子。日有食之。既

冬十月己丑。葬我小君敬嬴。雨。不克葬。庚寅日中而克

葬

敬嬴公穀作頃熊

子為諸侯母焉。得非小君說者議貶謬也。雨不克葬。惡不戒也。左氏以為禮大事不克而可謂禮乎。禮不

書爲雨止有禮則不書

城平陽

凡城書重守也

楚師伐陳

陳從晉也

九年○春王正月公如齊○公至自齊

拜會葬也

夏仲孫蔑如京師

王使來徵聘孟獻子往宣公立九年矣朝齊無歲不親如京之使纔一見且以徵行非禮也

齊侯伐萊

秋取根牟

邾婁之邑魯取也

八月滕子卒○九月晉侯宋公衛侯鄭伯曹伯會于扈
晉荀林父帥師伐陳

會扈謀伐陳也陳從于楚

辛酉晉侯黑臀卒于扈

晉成公卒于會荀林父以師還不書葬魯不會也何
以不會衛黑壤之怨也

冬十月癸酉衛侯鄭卒

衛成公卒，不書葬，魯亦不會，何以不會？衛孫良夫之詐也。

宋人圍滕

伐喪不仁也

楚子伐鄭，晉卻缺帥師救鄭

楚書爵，晉書名，卽如儒者例，未爲咄楚也。

陳殺其大夫洩冶

洩公殺
作泄

鄭穆公之女夏姬，陳大夫夏御叔之妻，徵舒之母，御叔死，靈公與大夫孔寧、儀行父通焉，衷其袒，匿服戲于朝，洩冶諫，寧行，父言于公，殺之，傳謂仲尼不直洩。

治有是乎。

十年○春公如齊○公至自齊○齊人歸我濟西田
上書公如齊下書歸田田之歸其以勞公也若曰十
年事我勤以相酬耳嗟夫此一濟西田也昔何以往
今何以來詩云旣往旣來使我心疚其濟西田之謂
與

夏四月丙辰日有食之

巳巳齊侯元卒○齊崔氏出奔衛

崔氏齊世卿惠公卒而出奔其素席公之寵耳書氏
以族行也

公如齊○五月公至自齊

奔齊喪也禮親喪子奔君喪臣奔諸侯相奔喪非禮也

癸巳陳夏徵舒弑其君平國

陳靈公與孔寧儀行父數淫于夏姬徵舒惡之遂弑靈公孔寧儀行父奔楚

六月宋師伐滕○公孫歸父如齊葬齊惠公

歸父仲遂子宣公不忘齊侯故亦不忘仲遂

晉人宋人衛人曹人伐鄭

鄭從楚也

秋天王使王季子來聘

報仲孫蔑也。諸侯之大夫九年一如京師。天子之貴介弟不踰年而報禮。比于滕薛之事魯耳。

公孫歸父帥師伐邾取繹

釋公作嶺

仲遂死而其子鑿貴矣。所以不忘東門之勲。爲豎子急成名也。抑或憤三桓之專。引媚子爲腹心乎。卒以如晉之謀。遂見逐也。

大水○季孫行父如齊○冬公孫歸父如齊

行父賀新君歸父獻繹捷事齊極備矣

齊侯使國佐來聘

報奔喪也。往來常禮。何足書。魯數往而齊一來。魯君往而齊臣來。齊倨而魯恭也。故夫君子恭近於禮。宣公之恭於齊。亦遠於禮乎。

饑○楚子伐鄭

鄭受晉盟也。是役也。晉士會救鄭。逐楚師于潁北。諸侯之師伐鄭。皆不書。何也。楚盛於莊王之世。晉政衰矣。栽培傾覆。天之道。聖人何擇焉。

十有一年○春。王正月○夏。楚子陳侯鄭伯盟于辰陵。陳鄭與楚盟。書。與晉盟不書。春秋之意可知。

公孫歸父會齊人伐莒

宣公寵利歸父內典軍政外結鄰好使無替先勲也
疎老成而任新進豈爲東門氏計長久乎

秋晉侯會狄于攢攢函

攢函狄地晉患狄使卻成子求成衆狄苦赤狄之役
許晉晉侯往會之詐也

冬十月楚人殺陳夏徵舒

討賊之辭說者謂不告天王貶稱人迂也

丁亥楚子入陳○納公孫寧儀行父于陳寧公作甯

討賊可也賊討矣而又入之甚矣納公孫寧儀行父
是除草而養其萌也二子淫惡從與以亡君殺徵舒

謝陳侯亦殺二子謝洩谷可矣左傳謂爲有禮是何禮與

十有二年○春葬陳靈公

陳靈公死二十有一月葬以亂故說者謂賊討後書葬楚不殺徵舒靈公不得葬乎

楚子圍鄭

楚圍鄭旬有七日鄭伯肉袒牽羊請降楚子曰能下人不可幾也退與之平而舍之

夏六月乙卯晉荀林父帥師及楚子戰于邲楚晉師敗績

春秋正義
卷之
不書晉救鄭何也楚既舍鄭不直晉之後戰也書及楚子戰戰非楚子得已也書收績直也說者謂楚長見絕于春秋無稽之言與

秋七月○冬十有二月戊寅楚子滅蕭

蕭貳于晉楚伐之宋救之蕭人執楚熊相宜僚公子丙楚請勿殺退師蕭人殺之楚遂滅蕭

晉人宋人衛人曹人同盟于清丘

衛地

拒楚也

宋師伐陳○衛人救陳

宋爲晉伐陳衛爲楚救之夫衛朝盟而夕貳孔達所

以不免也

十有三年○春齊師伐莒

公作伐衛

莒不事齊也

夏楚子伐宋

討其救蕭也

秋螽○冬晉殺其大夫先穀

殺作殺

先穀負晉多矣邲之戰違命喪師已又召狄伐晉晉殺之宜爾然書與洩冶孔達同烏有削爵之例

十有四年○春衛殺其大夫孔達

晉使人問衛之救陳者不首將加師孔達自縊君子

曰晉之迫諸侯何以異于秦之迫六國哉人知秦如
虎而不知晉如狼也

夏五月壬申曹伯壽卒○晉侯伐鄭

報鄭之役也

秋九月楚子圍宋

初宋救蕭伐陳楚子銜之楚使人適齊過宋不假道
宋人殺之楚子圍宋

葬曹文公○冬公孫歸父會齊侯于穀

歸父新進主諸侯行父諸人所以側目也

十有五年○春公孫歸父會楚子于宋

薦賄于楚孟獻子之謀

夏五月宋人及楚人平

楚圍宋久宋華元夜入楚師告令尹子反曰敝邑易子而食析骨而炊子反曰何子之情也告楚子楚子退師三十里與平君在書人此亦一徵

六月癸卯晉師滅赤狄潞氏以潞子嬰兒歸

潞赤狄族晉侯姊爲潞子夫人潞相酈舒虐殺之晉人滅潞殺舒以潞子歸

秦人伐晉

晉景公東畧狄魏顆禦秦師敗之輔氏

王札子殺召伯毛伯

天子之大夫爭政相殺也

秋螽

仲孫蔑會齊高固于無婁

初邑公作牟婁

傳不言其故君子曰禮之始失也諸侯非王事而自相會不自天子出矣無何諸侯與大夫會無何大夫與大夫會又不自諸侯出矣田氏篡齊三桓專魯六卿分晉職此之由

初稅畝

宣公在位十五年盟會薦賄之事多而饑歲相仍六

年蝥七年旱十年大水十三年蝥十五年又蝥力詘
舉羸焉得不苟取履畝加稅公田之法壞矣

冬蝥員生

蝥子也

饑

終春秋書饑三宣公十五年間二其甚者爾厚斂冗
費無荒政故足書

十有六年○春王正月晉人滅赤狄甲氏及畱吁

甚晉也始會以驕之離其黨以弱之遂滅之欺犬羊
無知而納諸刀俎凡晉事類此然則狄可縱乎曰聖

人防其害不殄其無辜

夏成周宣榭

謝公作火公穀作災

周宣王廟之檐榭天子宗廟災來告書

秋郊談伯姬來歸

出也

冬大有年

幸之也

十有七年○春王正月庚子許男錫我卒○丁未蔡侯申卒○夏葬許昭公○葬蔡文公○六月癸卯日有食之

己未公會晉侯衛侯曹伯邾子同盟于斷短道 晉地

初晉卻克入齊徵會足不良于行而聞婦人有笑帷中者銜之是役也齊侯不敢往以四大夫盟晉人併執之而逃

秋公至自會

初宣公事齊謹及齊晉有隙魯遂去齊齊魯離而晉得間自盟斷道始

冬十有一月壬午公弟叔肸欣入聲卒

叔肸宣公母弟初宣公篡立叔肸辭祿織履食至是卒書惜之說者謂書叔仲賜姓而世官也書卒大夫

也有始叔肸不仕亦氏亦卒大夫世官也與哉人死不稱卒遇伯兄不稱叔季若何可凡世儒說春秋迂誕類此

十有八年○春晉侯衛世子臧伐齊

斷道之盟齊不會晉衛共伐之齊侯受盟以公子彊質

公伐杞○夏四月○秋七月邾人戕鄆子于鄆

不虞而遇害曰戕

甲戌楚子旅卒

旅穀作呂

楚莊王亦一時賢諸侯也據經傳所載無論晉文幾

事而不如齊桓伐陸渾討夏南縣陳復之得鄭舍之
圍宋不取敗晉不驕念子文之勲爲立後知叔敖之
賢委以國斯亦春秋諸侯巨擘矣雖欲擯之焉得而
擯諸說者曰夷狄不卒卒不日卒而日簡之例窮而
辭支也不書葬沒其以王也

公孫歸父如晉

謀去三桓也或曰宣公不死三桓可去乎曰未可行
父忠勤聞于諸侯歸父新進物望未允公得國不正
外失齊好其弗濟矣

冬十月壬戌公薨于路寢○歸父還自晉至笙公穀遂

春秋直解
卷八終
奔齊

公薨季文子與臧宣叔逐東門氏歸父還自晉及笙使介復命壇帷而哭遂奔齊君子曰行父之逐東門氏也妒宣公之寵也初宣公奪嫡行父與有力事成公惟襄仲是德襄仲朝死子夕貴典重兵銜使命委任權力出行父上行父衷不平而歸父又謀去之謀未成宣公捐館而歸父爲朝露何怪乎雖然君死未殯逐其親臣是以君死幸也行父惡得爲仁哉

春秋直解卷八終